



XUNTA  
DE GALICIA



UNIÓN EUROPEA  
Fondo Europeo Marítimo e de Pesca



Axencia para a  
Modernización Tecnolóxica



## **ACORDO DE COLABORACIÓN ENTRE A CONSELLERÍA DO MAR DA XUNTA DE GALICIA E A AXENCIA PARA A MODERNIZACIÓN TECNOLÓXICA DE GALICIA (AMTEGA) PARA O FINANCIAMENTO E SUSTENTABILIDADE DO DESENVOLVEMENTO EVOLUTIVO DO PROXECTO DE MODERNIZACIÓN TECNOLÓXICA DAS LONXAS (LONXAS GALEGAS 4.0)**

En Santiago de Compostela, o día 16 de outubro de 2019, na sede da Consellería do Mar,

### **REUNIDAS:**

Dunha parte, **Rosa María Quintana Carballo**, conselleira do Mar, actuando en nome e representación da Consellería do Mar, en virtude das facultades recoñecidas polo artigo 34 da Lei 1/1983, do 22 de febreiro, de normas reguladoras da Xunta e a súa presidencia.

Doutra parte, **Mar Pereira Álvarez**, directora da Axencia para a Modernización Tecnolóxica de Galicia (en diante AMTEGA), actuando en nome e representación da dita Axencia, en virtude das facultades conferidas polo Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos e o Decreto 91/2012, do 16 de marzo, polo que se nomea directora da Axencia para a Modernización Tecnolóxica de Galicia.

As partes recoñécense capacidade e representación suficientes para formalizar o presente acordo de colaboración, e na súa virtude



## EXPOÑEN:

**Primeiro.-** Que o Estatuto de Autonomía de Galicia atribúe á Comunidade Autónoma, no seu artigo 28º, a competencia para o desenvolvemento legislativo e a execución da lexislación do Estado no ámbito da ordenación do sector pesqueiro. Neste sentido, o artigo 3.4 da Lei 11/2008, do 3 de decembro, de pesca de Galicia, modificada pola Lei 6/2009, do 11 de decembro, inclúe dentro das materias correspondentes á competencia da Comunidade Autónoma as relativas á ordenación do sector pesqueiro galego, á ordenación das estruturas, os mercados, a comercialización, a manipulación, a transformación e a conservación dos produtos pesqueiros. Así mesmo, no seu artigo 2.7, a citada Lei destaca: “7. Desenvolver e mellorar os procesos de comercialización e transformación dos produtos pesqueiros, así como fomentar o exercicio dun comercio responsable que garanta a calidade, a trazabilidade e a identificación dos produtos.”

Neste sentido, a Consellería do Mar ten entre os seus obxectivos prioritarios a mellora da dotación dos equipamentos nos portos pesqueiros, lugares de desembarque e ancoradoiros e a potenciación, difusión e promoción dos sectores e produtos pesqueiros galegos, co fin de intensificar o coñecemento dos mesmos e incrementar así a súa competitividade. Neste senso, a modernización tecnolóxica das lonxas e dos procesos de comercialización e xestión que nelas se desenvolven, redundará nunha xestión máis eficiente do sector pesqueiro, tanto no relativo a comercialización, como na trazabilidade dos produtos e un incremento da seguridade alimentaria.



**Segundo.-** Que, segundo o artigo 6 do Estatuto da Axencia para a Modernización Tecnolóxica de Galicia, aprobado polo Decreto 252/2011, do 15 de decembro, a AMTEGA ten entre as súas competencias, a dirección e xestión de todas as actuacións da Xunta en materia de tecnoloxías da información e as comunicacións e o deseño e liderado de iniciativas que contribúan a impulsar o desenvolvemento da sociedade da información en Galicia, garantindo os dereitos dos cidadáns e eliminando as barreiras que se opoñan á expansión e ao uso das novas tecnoloxías.

Así mesmo, de acordo co artigo 5 do Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos, queda desconcentrada na persoa titular da dirección da AMTEGA a competencia para subscribir con entidades públicas e privadas, en nome da AMTEGA, convenios de colaboración excluídos da lexislación de contratos do sector público.

**Terceiro.-** Que o Regulamento (UE) 508/2014, do Parlamento Europeo e do Consello, do 15 de maio, relativo ao Fondo Europeo Marítimo e da Pesca, recolle no seu artigo 68, Medidas de comercialización, as actuacións que se poden financiar neste ámbito de actuación, entre as que se encontran: mellorar a comercialización dos produtos, o fomento da calidade e o valor engadido, a contribución á trazabilidade dos produtos, a certificación e a promoción dos produtos da pesca costeira artesanal, a realización de campañas de comunicación e promoción para sensibilizar ao público respecto dos produtos da pesca e a acuicultura sostibles.

Estas accións desenvólvense a través do establecido no Programa Operativo do FEMP 2014-2020 de España para a o Obxectivo/Medida do FEMP, 5.1.3: Medidas de comercialización



XUNTA  
DE GALICIA



UNIÓN EUROPEA  
Fondo Europeo Marítimo e de Pesca



Axencia para a  
Modernización Tecnolóxica



Así pois, o obxecto do acordo considérase que cumpre cos requisitos de elixibilidade (S) establecidos na medida 1.4.9 do Programa Operativo 2014-2020, relativa á aplicación dos artigos 43.1 e 3 do REGULAMENTO (UE) Nº 508/2014 do Parlamento e do Consello do 15 de maio de 2014 relativo ao Fondo Europeo Marítimo e de Pesca.

Así mesmo, consideraranse elixibles (S) tódolos custes segundo o previsto no artigo 69 do REGULAMENTO (UE) Nº 1303/2013 DO PARLAMENTO EUROPEO E DO CONSELLO do 17 de decembro de 2013 polo que se establecen disposicións comúns relativas ao Fondo Europeo de Desenvolvemento Rexional, ao Fondo Social Europeo, ao Fondo de Cohesión, ao Fondo Europeo Agrícola de Desenvolvemento Rural e ao Fondo Europeo Marítimo e da Pesca, e polo que se establecen disposicións xerais relativas ao Fondo Europeo de Desenvolvemento Rexional, ao Fondo Social Europeo, ao Fondo de Cohesión e ao Fondo Europeo Marítimo e da Pesca.

Polo tanto, de conformidade co disposto no artigo 95 do REGULAMENTO (UE) Nº 508/2014, a porcentaxe do investimento elixible será do 100%.

**Cuarto.-** A Lei 14/2013, do 26 de decembro, de racionalización do sector público autonómico, establece no seu artigo 14 que a Administración xeral da Comunidade Autónoma e as entidades do sector público, ou estas entre elas, poderán formalizar acordos de colaboración ou cooperación para o servizo aos intereses xerais mediante o desempeño conxunto de tarefas de interese público da súa competencia.

A colaboración ou cooperación consistirá na participación conxunta e efectiva no desenvolvemento da actividade común, mediante achegas de traballos de organización, medios persoais e materiais ou recursos



financeiros para a finalidade compartida, de acordo coas respectivas competencias, e será sempre diferente das estruturas contractuais onerosas reguladas na lexislación de contratos do sector público.

Por outra banda, o Consello da Xunta, na súa xuntanza do 1 de agosto de 2014, acordou aprobar “as instrucións para o establecemento dun modelo de sustentabilidade para a dixitalización dos servizos públicos”.

**Quinto.-** Desde a efectividade da integración na AMTEGA dos servizos, recursos económicos e persoal de tecnoloxías da información e comunicacións da Consellería do Mar, a contratación en materia de Tecnoloxías da Información e as Comunicacións corresponde, con carácter exclusivo, á Axencia para a Modernización Tecnolóxica de Galicia.

Non obstante, en atención a súa tipoloxía, os expedientes financiados con fondos FEMP continuarán sendo xestionados pola Consellería do Mar ata que pola AMTEGA se cumpran todos os requisitos legalmente establecidos para asumir a xestión antedita.

Tendo isto en conta, e de cara a conciliar esta excepción coa competencia exclusiva da AMTEGA para a dirección e xestión de todas as actuacións da Xunta en materia de tecnoloxías da información e as comunicacións, cómpre levar á cabo este acordo de colaboración para o soporte dos traballos, cofinanciados con FEMP, que teñen como obxecto principal a modernización tecnolóxica das lonxas e dos procesos que nelas se desenvolven; traballos que deben ser dirixidos, e coordinados pola AMTEGA.



XUNTA  
DE GALICIA



UNIÓN EUROPEA  
Fondo Europeo Marítimo e de Pesca



Axencia para a  
Modernización Tecnolóxica



**Sexto.-** Con data 16 de setembro de 2016 asinouse un acordo de colaboración entre a Consellería de Mar e a Axencia para a Modernización Tecnolóxica de Galicia para o financiamento e sustentabilidade do proxecto de modernización tecnolóxica de lonxas, posteriormente adendado con data 27 de xuño de 2017.

O proxecto persegue, entre outros, a modernización tecnolóxica dos procesos de comercialización e xestión, melloras na calidade da información de trazabilidade, integración de información doutros axentes sectoriais, apertura dunha nova canle de comunicación entre a lonxas e os seus usuarios e unha xestión centralizada con mínima infraestrutura local. Presenta actualmente un importante grao de avance, tanto no deseño das novas solucións de xestión e comercialización, como na implantación nas lonxas e confrarías, tendo prevista a súa finalización, tal e como queda recollido no acordo de colaboración mencionado, con prazo límite 30 de novembro de 2019.

Dado a esixencia dos requisitos de normativos de trazabilidade e da comercialización dos produtos pesqueiros no ámbito da Política Pesqueira Común e da Organización Común de Mercados, e o seu constante cambio, faise preciso garantir a súa necesaria evolución coa incorporación de novas funcionalidades e requisitos, de cara ao desenvolvemento evolutivo das prestacións actuais

Tendo en conta o anterior, a Consellería do Mar, e a Axencia para a Modernización Tecnolóxica de Galicia manifestan a súa vontade de colaboración e con tal finalidade acordan a sinatura do presente acordo con suxeición ás seguintes



## CLÁUSULAS:

### Primeira: Obxecto

O obxecto do presente acordo é establecer as pautas que se seguirán na colaboración entre a Consellería do Mar e a Axencia para a Modernización Tecnolóxica de Galicia para a participación conxunta no desenvolvemento evolutivo do proxecto de modernización tecnolóxica das lonxas e dos procesos que nelas se desenvolven.

### Segunda: Financiamento

O importe da achega da Consellería do Mar para a execución do obxecto mencionado na cláusula primeira ascenderá a un máximo de UN MILLÓN SEISCENTOS CINCO MIL EUROS **(1.605.000 €)**, IVE incluído para os anos 2019, 2020 e 2021.

Estes importes serán obxecto de retención de crédito nas seguintes aplicacións orzamentarias e proxectos do seu orzamento:

- Anualidade 2019: 100.000 € (I.V.E. INC.)
- Anualidade 2020: 895.000 € (I.V.E. INC.)
- Anualidade 2021: 610.000 € (I.V.E. INC.)



Estes importes serán obxecto de retención de crédito segundo a distribución por anualidades que se indica, nas seguintes aplicacións orzamentarias e proxectos do seu orzamento:

- 2019.15.02.723.B.640.0 c.p. 2016 00286 (S) por importe de 100.000,00 € (75 % FEMP, e 25 % Fondos propios da Comunidade Autónoma)
- 2020.15.02.723.B.640.0 c.p. 2016 00286 (S) por importe de 895.000,00 € (75 % FEMP, e 25 % Fondos propios da Comunidade Autónoma)
- 2021.15.02.723.B.640.0 c.p. 2016 00286 (S) por importe de 610.000,00 € (75 % FEMP, e 25 % Fondos propios da Comunidade Autónoma)

Esta actuación encadrase dentro da Prioridade da Unión/Obxectivo/Medida do FEMP: 5.1.3.: Medidas de comercialización dentro do Programa Operativo do Fondo Europeo Marítimo e da Pesca para 2014-2020.

### **Terceira: Actuacións a desenvolver**

Ao abeiro deste acordo, pola Axencia para a Modernización Tecnolóxica de Galicia, desenvolveranse os seguintes proxectos:

- ✓ Desenvolvemento evolutivo e apoio na solución de comercialización dispoñible (XESCOM), que permite a partires da información obtida na identificación, clasificación e pesada das capturas descargadas na lonxa, a súa poxa nas distintas modalidades, a emisión dos documentos relacionados coa comercialización dos produtos, a xeración das notas de primeira venda e a súa correcta transmisión á autoridade competente



- ✓ Desenvolvemento evolutivo a apoio na solución de xestión dispoñible (XESLON) para as lonxas/confrarías, que permite a xestión da actividade propia da lonxa e da confraría (comercialización, subministracións, prestación de servizos, ...), a xestión da contabilidade, a xestión de cobros e pagos, a xestión dos impostos coas distintas administracións públicas e a xestión social da entidade (censo, información de interese, ...)
- ✓ Implantación de infraestrutura informática y de comunicacións (cableado, equipamento e traballos relacionados) necesaria para a óptima utilización das solucións mencionadas (XESLON e XESCOM) nas lonxas e confrarías adheridas ao proxecto

Asemade desenvolverase polas partes calquera outra actuación que, sendo complementaria das anteriores, acorden a Consellería do Mar e a Axencia para a Modernización Tecnolóxica de Galicia, sempre que o seu custo estimado non supere o importe da achega máxima recollida na cláusula segunda. No caso de actuacións que non sexan complementarias das incluídas nesta cláusula, ou que requiran un incremento do orzamento asignado no presente acordo, será suficiente unha addenda a este acordo que engada ditas actuacións á presente cláusula e o financiamento relacionado.

#### **Cuarta.- Compromisos das partes**

Ao abeiro deste acordo, pola Axencia para a Modernización Tecnolóxica de Galicia, desenvolveranse os seguintes compromisos:



- A tramitación administrativa e adxudicación do contrato ou contratos que teñan lugar para a realización do obxecto anteriormente definido. Para elo, a AMTEGA, como órgano de contratación, iniciará e aprobará os correspondentes expedientes de contratación
- O seguimento e a dirección das actuacións obxecto do contrato
- O cumprimento das medidas de información e publicidade establecidas na cláusula sexta do presente acordo
- A emisión dunha memoria vinculante sobre a correcta realización dos traballos

Ao abeiro deste acordo, pola Consellería do Mar, desenvolverase os seguintes compromisos:

- A tramitación económica e o financiamento dos expedientes de contratación a que se dera lugar
- A Consellería do Mar será a responsable de aboarlle ao contratista ou contratistas os servizos prestados, nos termos establecidos no contrato e segundo o prezo de adxudicación, unha vez recibidos de conformidade e certificados pola AMTEGA

A Axencia para a Modernización Tecnolóxica de Galicia e a Consellería do Mar, desenvolverán de xeito conxunto os seguintes compromisos:

- Na elaboración dos pregos de cláusulas administrativas particulares e de prescricións técnicas ou proxectos participarán conxuntamente a Consellería do Mar e a AMTEGA



- O órgano de contratación estará asistido, se fose necesario, por unha Mesa de Contratación que estará constituída por persoal da AMTEGA, e un representante designado pola Consellería do Mar. Tamén poderá participar persoal de ambas partes na emisión dos informes técnicos

### **Quinta.- Expedientes de contratación**

Nos expedientes de contratación acreditarase pola Consellería do Mar a plena dispoñibilidade do importe de licitación mediante a incorporación deste acordo, así como os certificados de existencia de crédito e a documentación que acredita a súa retención, ou documentos que legalmente os substitúan.

A AMTEGA actuará no expediente de contratación e na execución do contrato en nome e por conta das partes participantes neste acordo e poderá exercer todas as potestades que a lexislación lle recoñece ao órgano de contratación fronte ao contratista, sen prexuízo da adecuada coordinación nas relacións internas coa Consellería do Mar.

O expediente de contratación tramitarase consonte aos pasos e documentos establecidos no Manual Xeral de Procedemento para a Xestión, Seguimento e Control das Operacións Financiadas polo Fondo Europeo marítimo e de Pesca (Programa Operativo 2014-2020).

### **Sexta.- Medidas de Publicidade do FEMP**

A AMTEGA haberá de cumprir coas medidas de información e publicidade establecidas no Regulamento de Execución (UE) nº 763/2014 da Comisión de 11 de xullo de 2014, polo que se establecen disposicións de aplicación



do Regulamento (UE) nº 508/2014 do Parlamento Europeo e do Consello relativo ao Fondo Europeo Marítimo e de Pesca no que respecta ás características técnicas das medidas de información e publicidade e as instrucións para crear o emblema da Unión.

### **Sétima.- Vixencia**

Este acordo producirá os seus efectos a partir da data da súa sinatura e a súa vixencia estenderase ata o momento que finalice a execución de todos os contratos previstos, segundo as actuacións establecidas na cláusula primeira do presente acordo ou ben como máximo ata 30 de decembro de 2021, sen prexuízo de que antes da súa finalización se acorde polas partes unha addenda ao acordo na que se fixara a prorroga do mesmo e os novos compromisos das partes na prorroga.

### **Oitava.- Comisión de Seguimento**

Créase unha comisión mixta de vixilancia e control para atender ao adecuado desenvolvemento do acordo de colaboración, que terá entre as súas funcións:

- Determinar o obxecto e importe dedicado a cada un dos proxectos a executar con cargo ao presente acordo, sempre con suxeición ao obxecto e financiamento máximo establecido no mesmo
- Efectuar o seguimento de alto nivel no avance de cada un dos proxectos



- Resolver as posibles dúbidas que poidan xurdir na interpretación e cumprimento das cláusulas deste acordo

Esta comisión mixta de seguimento estará formada:

Por parte da Consellería do Mar :

- Subdirector/a Xeral de Pesca e Mercados da Pesca
- Xefe/a do Servizo de Análise e de Rexistros

Por parte da Axencia para a Modernización tecnolóxica de Galicia:

- Director/a da Área de Solucións Tecnolóxicas Sectoriais
- Xerente de Proxectos da Área de Solucións Tecnolóxicas Sectoriais

A representación nesta Comisión de Seguimento dos anteriores representantes poderá ser delegada de xeito expreso.

### **Novena.- Réxime xurídico e resolución de conflitos**

Este acordo de colaboración ten natureza administrativa, e rexerese pola Lei 14/2013, do 26 de decembro, de racionalización do sector público autonómico, pola lexislación en materia de contratos do sector público e polas demais normas de aplicación.



XUNTA  
DE GALICIA



UNIÓN EUROPEA  
Fondo Europeo Marítimo e de Pesca



Axencia para a  
Modernización Tecnolóxica



As discrepancias que poidan producir resolveranse nos termos previstos no artigo 13 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, para os conflitos de atribucións.

E en proba de conformidade co exposto, asinan este acordo por duplicado exemplar no lugar e data sinalados.

Pola Consellería do Mar

Pola AMTEGA

A conselleira

A directora da Axencia para a  
Modernización Tecnolóxica

Rosa María Quintana Carballo

Mar Pereira Álvarez